

## Nwàk nè Pol à Còm Fa Bùu sè Mvwe' Lak KÒLOSÌ

*Lak Kòlosì sè à ye mvwe' nzenḡòḡ Esiyà. Pol a fa ntum ye bə nza' cos fana yi sə tumsə lo ke' ḡgàa fàk wèḡ mvwe' coos sə wùriḡ. Yi ànə yuk də cìcàa mok à kè dzèḡ mvwe' cos Kòlosì nə, nə sə yə'rə fa bwiḡ də, a ye-a ḡga ḡwè dzəm də yi riḡ Nwì, nə tse' lùḡ nə dak àlɛ, ḡgèḡgàḡ tse' ḡgòkùksə ḡàaḡ mok sè yà'a yòḡsə. Wo sə yə'rə sè' də ḡwè tse' ḡgòdzè nsàap zuzuu mok nə ḡu tsooḡ bum mok co ḡgòkom tu mbəmbam sè'.*

*Pol à còm ḡgòrɛḡsə fa wo də Jisòos mo Nwì nè yi tse' liḡ nə casə bum sè Nwì à ḡù lònḡ. Yi tse' ḡàaḡ sè ḡgòlùḡsə ḡwè sə yi, də bum mok sè wo sə yə'rə fa wo yà'a jə ḡesə lòḡè ḡwè səsap bohòJisòs nə. Nwì ànə ḡu nzenḡòḡ nə ndzə bohòJisòs fana mvè'nə bum sə ànə sam bəp fana yi sə ḡù bònḡsə fəsə yà' sè' ndzə bohòJisòs nə. A ye-a də ḡwèe nə tse' lùḡ fana, yà' mèḡù bə liḡ Jisòs.*

<sup>1</sup> Sə còm ḡwàk nè'e mūu Pol nè Nwì a cokfis mū ḡgòye ḡgà ntum Jisòs Krest, ves moma àvès Timati. <sup>2</sup> Vès sə còm fa nà' bohòbūu Nwì sè mvwe' lak Kòlosì sè wo sə bə' Jisòs Krest bə nè zìnə. Tà Nwii fa wèḡ fifi, nə ḡu wèḡ bəbòḡ

*Pol Kwasə Būu Kòlosì  
Nə Lɛḡ Fa Wo Pìriyà Sè'*

<sup>3</sup> Ghà nè vès lɛḡḡ Nwì nè yi TÈ'e Tà Jisòs Krest àvès būu wèḡ pwe', vès sə kwasə yi. <sup>4</sup> Vès

kwasègè yi ve'nè bùúsè vès a yuk mvè'nè wèṅ a fa ntum awèṅ bohòJisòs Krest, nè ye mvè'nè wèṅ sè dzəm bùú Nwì wèṅ pwe'. <sup>5</sup> Vès rì dè wèṅ tse' nsàp ntum ànè bùúsè wèṅ riṅ bum sè Nwì a nòṅsè fa weṅ mabu bèboṅni. Wèṅ ànè yuk bum yè'sè ndzənè Ntirè nè Bèboṅ nè nà'a zìnè nè. <sup>6</sup> Ntirè ènè sè yuhu lòsənè ṅgònè lònṅ. Bwìṅ yuk nà' fana nà' sè kupsè ntum awo. Nà' sè gù bwìṅ wùriṅ ṅgòdzəm bohòJisòs Krest. A sè' zeṅ nè nà' à dzèṅ bohòwèṅ, nè kupsè ntum awèṅ sè'. Yè'sè ànè yeto ghà nè wèṅ ànè yuk bèbo nè Nwì, nè rēṅ zìnè nè yi sè gù bohòṅgàa gù bap wèṅ. <sup>7</sup> Anè tsok to fa weṅ ntirè ènè Ipafràs. Vès dzəm yi ve'è wùriṅ. Venè wèṅ fàkgè bohòJisòs Krest bəbè'. Yi tə mungorè wèṅ fa'nè mvwe' kùu avès, nè sè fak bohòJisòs Krest bə ntum nè mò'fis. <sup>8</sup> Yi a tsè' ves yi dè wèṅ tse' dzədzəm bohòbwìṅ, nsàp nè nà' vè bohòYòṅsè Nwì.

<sup>9</sup> Ye jəṅ mvè'nè vès à yuk bum yè'sè fana vès sè lēṅ fa weṅ Nwì nùumbu pwe'. Vès sè lēṅ yi dè yi gù weṅ ṅgòrì bum sè yi dzəm yà' pwe'fo' jəja paam. Yà' a ye ve'nè, wèṅ tse' nsàp ṅkərè nè nà' vè bohòYòṅsè ye, fana wèṅ rēṅ bum ye pwe' nè pwe'. <sup>10</sup> Nkərè ànè nè gù weṅ ṅgòcu nsàp nè kəkərè cò bùú Nwì, nè gù bum nsàp nè yà'a sè boṅ yi, nè sè riṅ ghaha lo bum Tà Nwì mantombi. <sup>11</sup> Nwì gù weṅ bə ṅàaṅ ye sè yà' ghak yà pwe', ṅgòko ntum, nè təəṅ gūgūṅ ya a ye-a sè yà pwe', wèṅ sè lo mali mantombi bə kwəkwa. <sup>12</sup> Wèṅ sè gù ve'nè wèṅ sè kwasè Tà Nwì àvès ghà yà lònṅ bùúsè a yi nè yi a gù weṅ ṅgòye kəkərè ya wèṅ kə tse' ma njàwèṅ sənə

bum sè yi a fùhù nònṣə fa bùu ye wèṅ yà' mvwe' mareṅ sə. <sup>13</sup> Yi a jə fis gəsə ves mvwe' ndzəm, nə nònṣə ves mvwe' mareṅ nè mo ye nè yi dzəm nà' cu ṅkum fo' yi. <sup>14</sup> Mo ye ànə swifa ves bup avès, nə ywiṅ tiṅ fəsə ves bohòbup.

### *Jisòs Tse' Nàṅ Pwe' Yi*

<sup>15</sup> Nwè nəmòk ka Nwì bə lis ye yuk. Mo ye nè bwìṅ à yə yuk yi a nìtsə' fa ves mvè'nè Nwì cu yi. Yi mo Nwì nè yi tse' liṅ nə casə bum sè Nwì à gù lònṅ. <sup>16</sup> Nwì à gù bum pwe'fo' ndzə bohòyi mo ye nə. Bum sè yà' cu sə nze co lis ye yà', bə sè yà' cu mubu co lis kà yə wèṅ, co ze' bə masinjàa Nwì, nə ye nsàp ṅàṅ nè fòpwe' nè nà' cu. Bum yè'sə pwe', Nwì à gù yà' ndzə bohòyi, fana gə yà' də yà'a sə yuk bohòyi. <sup>17</sup> Mook sè' də Jisòs Krest à ye to mantombì yi. Bum pwe' cu làṅṅ mvè'nè yà'a yè'sə sè' bùu Jisòs Krest nə. <sup>18</sup> Nə ye fe'lə sè' də, yi tu bohòcos nè nà'a ni' ye nə sè' yi. Yi à yèto cos yi, bùusè yi à lòkok to mvwe' kpə yi. Yi mantombì bə bum yè'sə pwe' ve'nə, də ya a ye-a sè yà lònṅ, yi megu ye ṅwè nè mantombì. <sup>19</sup> Bum yè'sə ve'nə bùusè ànə boṅ kok Nwì də mo ye ye sè' ṅgàṅ mvè'nè yi Nwì yi cu bə tu ye pwe' nè pwe'. <sup>20</sup> Fana yi jəṅ mo ye nə, nə tes ṅkèṅ bə zèṅ, ya bum pwe' ye fe'lə cù mò'fis sèmok. Yi à be'lə bum sè sə nze bə sè mubu ṅgòye cù mò'fis ndzə ni' yi ve'nə bə kpə mo ye nè yi à kpə muntəṅ nə.

<sup>21</sup> Mvèk mòk à ye fa' sè' nè wèṅ Nwì wèṅ à ka ṅge' yeṅ. Yà' à ye ve'nə bùusè wèṅ à sə tsərə bup, nə sə gə sè' bum sè bup. <sup>22</sup> Nə ye də nè ṅga'a nè'e, Nwì a gù də wenə wèṅ ye fe'lə ṅge'

sèmok. Yi a gù yè'sə bə kɾu mo ye muntəən, nè yi a kɾu bə ɲgùpni' co ɲwè. Yi à kɾu də ya wèen tse' ntəm sè rərən; ya wèen kə təən mantombii Nwi ɲga wèen rərən nə ye jì jòn zinə bə zinə. <sup>23</sup> Wèen nə təən mantombii Nwi rərən vɛ'nə ɲga wèn nònɲsə mali-a ntəm bə ncèp nè Jisòs nə, ɲga wèn tə gʊgʊ, nə kà tsòhò, nə sə naan tu bə bum sè Ntirè nè Bèboɲ nə à tsè' to wən də wèen nè tse' sə. Nà' mègù sè' Ntirè nè Bèboɲ nè wo à tsòho fa bwìɲ ma nè fòlòon nə. A zen nè mùu Pol, mù sə tsòho fa bwìɲ.

### *Pol Sə Jihi Nzòɲ NgòFàk Gʊgʊ*

<sup>24</sup> Mvè'nè mù sə yə ɲgə' bùu tu awèn, mù sə kwa kwa. Mù sə kwa vɛ'nə bùusè mù sə yə ɲgə' sè' mvè'nè Jisòs Krest ànə ye ɲgə' sè' bùu cos nè nà'a ni' ye, də ya ɲgə' nè yi sə yə nə kə gʊ mesə fàak ye. <sup>25</sup> Mʉ ɲgà fàk bùu cos wèn. A gèsə fa mù fàak yè'sə ndzə bohòmù Nwi, də ya mù tesə wən. Fàak sə duk də, mù tsoho fa bwìɲ yusè yà' cu ndzənə Ntirè nè Bèboɲ lòon fo'. <sup>26</sup> Ncèp nè mù sə tsè' fa bwìɲ ènə, a cà luumɲgòn cèbùè ɲga nà' cu sèswihì, bwìɲ kà rì. Nè ɲga'a nè'e yi a fis vè nà' mok jəja bohòbùu ye wèn. <sup>27</sup> Yà' à bònwi də yi jən ncèp nè nà' à ye sèswihì ènə, nə niɲtsok fa bùu ye wèn nà' mvè'nè nà' yam bòo, nə niɲtsok fe'lə nsàp maɲgəɲgèn swe' nè nà' tse' bohònzenɲgònə pwe'. Ncèp nè nà'a rɛɛn vè ènə, nà'a də, Jisòs Krest cu sə ntùu wèn, fana aco wèn naan tu də wèen nè kə tse' ma njàwèn sənə bòn Nwi sə. <sup>28</sup> Nà'a njo nè vès sə tsòho

fa bwìṅ Jisòs Krèst nùumbu pwe' nə. Vès sə cəp sɔŋ bwìṅ ntu', nə sə yə'rə wo bə ŋkərè sè', də ya ndàaŋwè pwe' nə yi ŋwəə Jisòs Krèst kə dzeŋ mvè'nè Nwì sə dzəm. <sup>29</sup> Mù sə fàk gʊgʊŋ bə bum yè'sə lònŋ, nə sə jihi nzònŋ də mʊ gʊ mesə fàak ye sə bə nàaŋ sè Nwì gèsə fa mʊ.

## 2

### *Pol Tsərə Krətèeŋ Mok*

#### *Yà'a Sə'*

<sup>1</sup> Mù dzəm ŋgòtsə' fa weŋ də wèŋ cu sə ntuə mʊ vɛ'ɛ gʊgʊŋ wùriŋ. Krətèeŋ sə mvwe' lak Làòdisiyà bə mok sə vesi wèŋ ka si bə si ntòyenə yuk yà'a pwe', wo cu sè' sə ntuə mʊ. <sup>2</sup> Mʊ lɛŋgə Nwì mʊ tuhù wèŋ vɛ'nə də ya ŋga wèeŋ sə tse' dzədzəm bohòmòk bə mòk. Ya dzədzəm ènə jəŋ be'lə və weŋ mvwe' mò'fis nə sə kwɛ'sə weŋ. Mù sə lɛŋ sè' də Nwii rɛŋsə fa weŋ yu nə nà' cu səswihi nə nà'a Jisòs Krèst, ya wèeŋ riŋtse' bə zeŋ bəboŋni. <sup>3</sup> Jisòs Krèst mɛgù yi nə mò'fis nə yi cɔ ki ncù sə aco yi muk fa bwìṅ mandzè nə ŋgòri ŋkərè nə ma nə Nwì. Nsàp ŋkərè ènə nà' tse' swe' bohòŋwè nə yi rì nà' nə wùriŋ.

<sup>4</sup> Mù sə tsə' weŋ yè'sə də ya ŋga ŋwə nəmòok kà weŋ bə cù kè bòrè. <sup>5</sup> Mù sə cəp yè'sə bùusə a sə kà-a si bə si sè yenə, mʊ sə tsərə weŋ də vesùwèeŋ bəbɛ'. Mʊ nə sə kwa ŋga bum pwe' sə lólàaŋ, wèŋ sə təəŋ mali gʊgʊŋ ŋgòfa ntum awèŋ bohòJisòs Krèst.

### *Nwèe Kà Weŋ Bə Ŋkərè Nzeŋgòn Bòrè*

6 Yúsè gùgùṅ sè dè, wèṅ a jè Jisòs Krèst co Tà àwèṅ laṅ fana, wèṅ gi-a mok co bùu ye sè zìnə. 7 Wèṅ sè jèṅ ṅàaṅ awèṅ bohòyi, nè sè kuk lo mantombi. Wèṅ fa mam mali ntum awèṅ bohòyi mvè'nè wo à yè'rə to wèṅ, nè sè kwasə Nwì ghà yà lònṅ.

8 Wèṅ jèṅ ṅkərə dè ya ṅwè nəmòok kà wèṅ bə ṅkərə nzenḡòn nè nà' ka fàk tse' nè'e bòrə. Nsàp ṅkərə ànə tesə kokḡè sè vèə bwiṅ, nè ye bə yòṅsəə ze' wèṅ. Nà'a kà bohòJisòs Krèst tesə vèḡè. 9 Zìnə nè nà' a ca nè dè, Jisòs Krèst nè cu bə tu ye pwe' nè pwe' mvè'nè yi Nwì yi cu sə. 10 Wèṅ tse'-a Jisòs Krèst, ye dè wèṅ sè kà yumok sè yà'a ma nè Nwì mok jamə. Yi ṅkum, nè tse' ṅàṅ mətuhù yòṅsəə ze' wèṅ pwe' yi. 11 A yà'sə sè' dè, wèṅ ànə be'lə wèṅ Jisòs Krèst mvwe' mò'fis, fana yi à ḡwè fa wèṅ ṅwè nè ṅḡònitsè' bwiṅ dè wèṅ bùu ye wèṅ. A ye mantombi fa', Nwì à fa bùu Jus wèṅ ṅwè nè njàwo ṅḡònitsè' fa bwiṅ, à ye dè wo kom fa wo tu mbəmbam. Nè ṅga'a ṅwè nè njàwèṅ ka yusè wo ḡḡè yà' bə bo bwiṅ yeṅ. Njàwèṅ nè nà' vè bohòJisòs Krèst, mvè'nè yi ànə fis mak ḡesə ntum awèṅ sè bup sè wèṅ à tse' to mantombi yà'a. 12 Ghà nè wo ànə baptesə wèṅ, yà' à ye yà'sə co wo tuuṅ be'lə wèṅ Jisòs Krèst, nè lokok be'lə mvwe' kpə sè' wenə wèṅ bəbɛ'. Yè'sə vɛ'nə bùusè wèṅ ànə dzəmtse' bə ṅàaṅ Nwì sè yi ànə lokoksə Jisòs Krèst mvwe' kpə bə zeṅ. 13 Wèṅ ànə ye co bùu sè wo à kpə laṅ bùusè wèṅ à ḡù bup, nè ye fe'lə bùusè wèṅ à ka ṅwè nè ṅḡònitsè' dè wèṅ bùu Nwì tse'. Fana Nwì swi fa vesùwèṅ bup avès, nè lokoksə ves

Jisòs wèŋ m̀wwe' k̀p̀ b̀b̀e'. <sup>14</sup> Vesùwèŋ ànə gb̀ ǹzak laŋ b̀ùsè vès ànə ka l̀ùk Nwì ǹŋsə. Nwì yis fis fa vesùwèŋ ǹzak nə p̀we', nə naaŋ gesə lo m̀tuhù Jisòs Krèst ghà nə yi à k̀p̀ m̀ntəəŋ nà'a. <sup>15</sup> Yi à jə gesə ǹaaŋ yòŋsəə ze' bə k̀p̀ ye nə m̀ntəəŋ ànə fana nə ǹŋtsok fa bwìŋ jəja k̀waraŋaŋ də ǹaaŋ ye gha' ǹaaŋ yòŋsəə sè b̀p̀ l̀oŋ fo'.

*Bum Sə Yà' Ka Fàk Bohòŋwəə Jisòs Tse'*

<sup>16</sup> Bə bum yè'sə p̀we'fo', kà də wèŋ fa mandzè də ŋwə nəm̀òk ǹŋsə fa wèŋ nsàp l̀ùk mòk də wèŋ tse' ŋgògù yà' co də z̀ nə no megu nsàp yu nè'e, nə kà nsàp nè'e ye d̀k. Ǹwèe kà də yi g̀ fa wèŋ l̀ùk bə nsàp yu nə wèŋ tse' ŋgògù bə ŋkàak l̀umŋgòŋ, ŋwə-fi nə ye co ǹumbu dzè wèŋ sè' d̀k. <sup>17</sup> Bum yà'sə p̀we' co tsətsèŋ. Yà' sə nì gèsə l̀òmantombì bə yu nə nà'a nə kè ye nə. Yu nə tsətsèŋ yè'sə sə nì gesə l̀òzèŋ nə, Jisòs Krèst bə tu ye. <sup>18</sup> Kà də wèŋ yu'rə bohòb̀ù sè wo sə l̀ap mandzè ŋgògù b̀psə wèŋ b̀psə yà'a d̀k. M̀ sə d̀k bə nsàp b̀ nə co sè wo d̀kgè də wèŋ jəŋ tsoŋ nì' awèŋ sə nze, nə k̀ksə masinjàa Nwì wèŋ yà'a. Ǹsàp b̀ù yà'sə wèŋ d̀kgè də Nwì tsè' wo bum yè'sə co ndzənə lo v̀e, ŋga wo sə nə mègù yà'sə nì' wà nə wà. Ǹsàp tsətsərə awo yà'sə mègù sə nzeŋgòŋ fən. <sup>19</sup> Fana wo sə kà bə Jisòs Krèst nə yi tu bohòvesùwèŋ nə mok be'lè. B̀ù sè wo sə be'lə m̀wwe' mò'fis bə Jisòs Krèst wèŋ yà'a mègù wo sə wo jəgè ǹaaŋ awo bohòyi, də ya wo sə k̀k m̀vè'nə Nwì sə dzəm də wo k̀k. Jisòs Krèst a g̀ cos nə ŋgòye

mvwe' mò'fis, mvè'nè nzèhe ni' kotse'gè ñgùpni' nò mvwe' mò'fis yè'e.

<sup>20</sup> Mù dè wèñ à kpɛ wèñ Jisòs Krèst wèñ, yòñsèè sè ze' sè sè nze fèeñ ka ñàñ mok mɛtuhù wèñ tse' àlaa. Njo nè wèñ sè gu bwi bum co bòp bù nè nzeñgònè tse' wo yi-e bùu yà? Njo nè wèñ sè wəp mali nsàap lùuk sè co dè, <sup>21</sup> <<Kà yu yè'e jwèñ, kà yè'e zɛ ja'a, nò kà yà'a kùm>> wèñ bùu yà? <sup>22</sup> Nsàap lùuk sè vè'nè yè'e yà' mègù bə bum sè co ñwèe zɛ-a yà', yà' me bisə wà. Nsàp yəyərè nà'nè, nà'a vè mègù bohòtsətsərè nè bwìñ. <sup>23</sup> Bwìñ tsərəgè dè nsàap lùuk yà'sə bum ñkərè bohòNwì, bùusè yà'a gùgè ñwè bə ñàñ ñgògù bum sè ñgòkùksə Nwì, nò sè jə lònì' awo sè nze, nò sè fa ni' awo sè ñgə' wèñ. Bum yè'sə pwe'fo' yà'a wà nè wà. Yà' ka ñàañ mok sè co yà' tɛsə ñwè dè ya nje yu nè ñgùpni' ye sè dzəm zèñ kà yi ya tse'.

### 3

#### *Jisòs Krèst Bùsə Wèñ*

##### *Bùu Sè Fì*

<sup>1</sup> Nè wèñ a lòkok mvwe' kpɛ wèñ Jisòs Krèst wèñ lañ fana wèñ nonşə gu ntəm awèñ bə bum sè yà'a ma mabu. Wèñ fa ntəm awèñ lɛ fa'nə, bùusè yà'a mvwe' sè Jisòs Krèst cu fo' bo ma mà'a Nwì. <sup>2</sup> Wèñ sè tsərə megu bum sè yà'a mbwa yà'sə, nò kà sè sè nze fèeñ sè tsərə. <sup>3</sup> Bùsə bə bum sè ma sè nzeñgòon fèeñ, wèñ yàwèñ bə zèñ mok co bùu sè wo a kpɛ lañ. Yòñsè awèñ mègù mok nè nà' cu bohòJisòs Krèst ndzə bohòNwì, yi sè lòksə fa wèñ nà'. <sup>4</sup> Jisòs Krèst nè



yi tse' yòṅsè awèṅ nè wèṅ cu ṅga'a ṅwəm bùu yi nè kə yəəṅ ntsə'mòk fana wèṅ yəəṅ be'lə wenə wèṅ bəbɛ'. Wenə wèṅ nè yəəṅ ntsə' ànə bə ṅàṅ vɛ'ɛ wùriṅ. <sup>5</sup> Ye də wèṅ zə ɣesə bum sè yà' cu ndzə ni'ì wèṅ sè yà'a bum nzeṅgòn co: ko sàhà, fwɛ', ṅgòdzəm bum sè yà'a bɔp, nè ye ṅgòwa kɛ'cà bum wèṅ. Busè ṅgòwa kɛ'cà bum vɛ'nə ye də wèṅ sə kuksə yà' co Nwì. <sup>6</sup> Yà'a nsàap bum sè yà'a nè ɣu ṅkuṅ Nwì jok bohòbwìṅ, ṅɣə' və.

<sup>7</sup> Wèṅ à sə ɣì tɛp to mantombi fa' sənə nsàap bum yà'sə, ɣhà nè wèṅ à cu ntòca nà'a. <sup>8</sup> Nè ṅga'a nè'e mù sə tsə' wɛṅ də wèṅ teṅsə nsàap bum yà'sə pwe'. Nwèè kà sə jòk, kà ntəm cep, kà ṅwè ròm, kà liṅ ṅwè nəmòk bɔpsə, nè ye sə' də ncèep sə bɔp kà kə cùhu wèṅ sə tesə. <sup>9</sup> Kà ṅwè mɔwès sè' ci' fa, bùusè wèṅ a mè'rə màk ncu ṅwè nè zəm nè bə fàak ye laṅ. <sup>10</sup> Wèṅ tse' ṅga'a mok ncu ṅwè nè fi. Nwè nè fi nè Nwì a ɣù ènə, yi ɣùgə nà' nùumbu pwe' ṅgòbòghaha lòmantombi ṅgòkə ye sè' co yi Nwì, ya wèṅ sə riṅ ghaha lo yi mantombi sè'. <sup>11</sup> Busè wèṅ mok bùu sè fi fana ṅwè nəmòk ka bohòwèṅ zok mok ye. Mòk ka mòk də nè'e ṅwəə Jus, nà'a ṅwè lakmɔvum, jàmṅgaṅ bə ṅwè nè sə ṅɣəà ka mok sè' yeṅ. Mòk ka mok də nè'e ṅwè nè wo kom fa yi tu ṅwəmbam, nè'e ṅwè nè wo ka yi kom fa yeṅ, ṅkwèṅ bə molak wèṅ mok bùè. Bwìṅ pwe' mègù mok mò'fis bùusè Jisòs Krɛst mègù sè' mò'fis nè yi tse' bwìṅ ma nè fòpwe' yi.

<sup>12</sup> Wèṅ sə tsərə tse' də wèṅ bùu sè Nwì a cokfis wɛṅ ṅgòye bùu ye, yi dzəm wɛṅ. Wèṅ tse' koksəmanziṅ bohòbwìṅ, nè sə ɣu bəbɔṅ.

Wèen jəŋ ni' awèŋ sə nze, nə ye fùè, nə sə ko ntum sè'. <sup>13</sup> Kà də wèen sə jok kɛ'ca bum nənək duk. A ye-a ŋga ŋwè nəmòk ɣu-a wu bəp, wù swifa yi. A vɛ'nə bùusè Tà Jisòs Krɛst ànə swifa wɛŋ, wèŋ tse' ŋgòswifa bwìŋ yàwo sè'. <sup>14</sup> Bə bum yè'sə pwe', nè nà' ɣu ɣha' ca nə də, wèen tse' dzədzəm bohòbwìŋ. Nà'a zɛŋ nè nà'a kɪ be'lə tse'gè bum pwe' mɔwɛ' mò'fis mpaan nè mpaan. <sup>15</sup> Yusè wèŋ sə ɣu-a pwe', yà'a ye bə fifi nè Jisòs Krɛst a fa wɛŋ. Busè Nwì a to benə vè wɛŋ co ni' nè mò'fis də ya wèen cum bə nsàp fifi ànə. Wèen cu wèŋ sə kwasə Nwì ɣhà nè fòlòon. <sup>16</sup> Wèen ɣu də ncèp Jisòs Krɛst cum sə ntùè wèŋ nùumbu pwe'. Wèen sə yə'rə, nə sə tip bwìŋ bə ŋkərə. Yəm nsàap ŋkì zəzok ŋgòkùksə Nwì bə zɛŋ. Wèen yəm, wèŋ sə kwasə Nwì sə ntùè wèŋ. <sup>17</sup> Fana a ye-a ŋga wèŋ sə ɣu-a sè yà kè wèen cep-a sè yumok pwe', yà' ye megu bə liŋ Tà Jisòs Krɛst. Wèen sə kwasə Nwì nè yi tè' avès sè' bə liŋ ye sə.

### *Ncu Nè Bə Dzədzəm Munda'à*

<sup>18</sup> Ŋgwe yuk bohòndum bùusè a kəkərə bohòTà də yà'a ye vɛ'nə. <sup>19</sup> Ndum dzəm ŋgwe yo, nə kà də wù sə ɣu yi co yi yu nè wà duk. <sup>20</sup> Bwɛŋke' wèen yuk duk ma bə tè' awèŋ, bùusè wèen ɣà vɛ'nə, Tà sə kwa bohòwèŋ. <sup>21</sup> Tè' bə ma, kà də wèen sə ɣu bwe awèŋ nsàp nè co wo sə tɛ' kɛ'cà tɛ'lə duk.

<sup>22</sup> Wèŋ sè wèen fàkgè ŋkwèŋ bohòŋwè sə nze fɛn, wèen yuk duk masàa awèŋ sə bə yusè wo sə tsè' wɛŋ lònŋ. Kà də wu fàk mègù ŋga masà yònə fo' ŋga yi kwasə wu duk. Fàak, nə kà lis

manƿkwèŋ kùk, co ŋwè nè yi sə wəp Tà Nwì. <sup>23</sup> Bə yusè wù sə gù lòŋ, wù gɹ yà' bə ntəm nè mò'fis, bùusè wù sə kà yà' bohòŋwè gù fa mègù. Wù sə gù fa yà' bohòTà Jisòs Krèst. <sup>24</sup> Tà Jisòs Krèest masà awèŋ yi. Wèŋ rì sè' də yi nə nè kè làk wèŋ bə bum sè bəboŋ sè yi gù nòŋsə fa bùu ye wèŋ. <sup>25</sup> Ŋwè nè yi sə gɹ-a bɹp, wo nè kè làk yi sè' bə bɹp. Nwì kà ŋwè nəmòk gèm ko fagè.

## 4

<sup>1</sup> Wèŋ sè wèŋ yàwèŋ masà, wèŋ kotse' bùu sè wo sə fàk ŋkwèŋ bohòwèŋ zìnə, nə sə gɹ wo bəboŋ. Wèŋ rì də wèŋ tse' ŋwè nəmòk nè yi masà bohòwèŋ sè', yi cu mabu.

### *Pol Sə Tip Fe'lə*

#### *Bùu Kòlosi Wèŋ*

<sup>2</sup> Wèŋ sə ləŋ pìriyà ghà yà lòŋ. Wèŋ nəm lis awèŋ to, nə sə kwasə Nwì. <sup>3</sup> Wèŋ sə ləŋ fa ves sè' də Nwì nè fa ves mandzè nè co vèes tsoho fa bwìŋ yusè sèswihì sè Nwì a tsè' fa ves bə līŋ Jisòs Krèst sə. Mù cu yè' mɹ ndapndzəmè sè' bùu ncèp ènə. <sup>4</sup> Wèŋ ləŋ Nwì sè' də yi gɹ mɹ ya mɹ tsoho rəŋsə fa bwìŋ yà' mvè'nə mù tse' ŋgòtsè' fa wo sə.

<sup>5</sup> Wèŋ cu wèŋ bùu sè wo ka bùu cos yèŋ, wèŋ cum ncu ŋkərə. Ghà nè wèŋ tse'-a mɹmandzè pwe', wèŋ sə gɹ wo bəboŋ. <sup>6</sup> Ncèep cùu awèŋ ye bəbwe', nə sə ləm co ci'. Ŋwè nəmòok fek-a wèŋ yumok, wèŋ rīŋ ŋgòcèp fəsə fa yi bə mandzè nè bəboŋ.

### *Pol Sə Cèpsə Lèsə Wo*

<sup>7</sup> Tìkikòs nè yi moma avès nè vès dzəm yi nə, yi nə kə tsoho fa wenj mvè'nè mù cu pwe' yi. Yi fàkgè vesiwèṅ bohòTà Jisòs bə zìnə ye pwe'.  
<sup>8</sup> Mù tumsə tsə gù yi bùu njo nè də ya wèṅ riṅ mvè'nè ves cu fən. Nə ye sè' də ya yi gu ntəm awèṅ sə kwa sè'.  
<sup>9</sup> Tìkikòs nə, yi bə molak àwèṅ nè liṅ yee Onisimù nà'a bəbè'. Yi sè' moma avès nè vès dzəm yi. Yi fàkgè bohòJisòs sè' bə zìnə ye pwe'. A wo sè wo nə tsoho fa wenj bum sè yà' a ye fəṅ pwe'.

<sup>10</sup> Aritakònə vesi cu ndapndzəm cəpsə wenj pwe'. Mak nè yi motè'ε Bànabà nà'a cəpsə wenj sè'. Mù à tip wenj laṅ də Mak nə kè tsèṅ-a wenj, wèṅ gu yi bəboṅ.  
<sup>11</sup> Jisòs nè liṅ ye mòok Jostòs nà'a sə cəpsə wenj sè' bəboṅ. Bùu Jus sə vesiwèṅ sə fàk bəbè' mègù wo sè tɛ' yà'sə. Vesiwèṅ sə fàk ṅgògà co bwìṅ riṅ gaṅ ṅkum Nwì sə ntùè wo. Wo a tɛsə jə mɛ vɛ'ε nsàp nè ntəm boṅ mɛ.

<sup>12</sup> Epafèràs nè yi sè' molak àwèṅ cəpsə wenj bəboṅ. Yi sè' ṅgà fàk Jisòs Krɛst. Yi lɛṅgè Nwì mɛ tuhù wèṅ bə ṅàṅ də wèṅ kuk bə bum sè ma nè Nwì pwe'. Də wèṅ riṅ bum sè Nwì sə dzəm, nə sə yuk duk ye.  
<sup>13</sup> Mù a yə bə lis am mvè'nè yi a fàk guṅ guṅ bùu wèṅ, wèṅ bùu lak Kòlosi bə sè Làòdisiyà nə ye lak Hìrəpòlis.  
<sup>14</sup> Luk nè yi doktə àvès, nə a dzəm yi wùriṅ, nə ye Dimà wèṅ cəpsə wenj bəboṅ.

<sup>15</sup> Cəpsə fa mɛ bwema sè mvwe' lak Làòdisiyà bəboṅ. Cəpsə Nimfà bə cos nè munda'à yi nà'a sè'.  
<sup>16</sup> Wèṅ ta ṅwàk nè'e, wèṅ tum fa cos nè mvwe' lak Làòdisiyà ya wo taṅ nà' sè'. Wèṅ taṅ ṅwàk nè Làòdisiyà nə tumsə fa wenj nà'a sè'.

<sup>17</sup> Wèeṅ tsok fa Akipòdè mù duk dè, yi fak wes fàak sè Tà a fa ndzè bohòyi yà'a. <sup>18</sup> Mùu Pol, mù còm fa weṅ cècèpsè nè'e mok bə bo yàm. Wèeṅ sè tsərə kwaṅ sè mù cu bə zeṅ yè'e. Bèbo nè Nwii ye bohòwèṅ lònṅ.

**Nwàk Nwì Ma Rùk Nè Fi**  
**New Testament in Yamba**

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 22 Feb 2024 from source  
files dated 29 Jan 2022

c475d5b3-da44-51cf-93ca-f255b72fe481